



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百三十九

咸豐四年甲寅閏七月戊寅諭軍機大臣等前據王慶雲奏
各路糧臺運儲糧石一摺當交軍機大臣會同戶部速議具
奏茲據恭親王奕訢等酌覈例案詳議覆奏現在賊氛未靖
各路軍營需餉浩繁部庫籌撥銀兩實形支絀疊經降旨並
由戶部奏明行知琦善向榮勝保等軍營運儲米石以充軍
食湖北等省漕糧均准截留接濟山東折漕因恐出入折耗
令將米石撥營備用各屬倉社米穀均准關支僧格林沁軍
營亦屢奏勸捐糧草可見銀糧兼支為現時要務與其空言

撥餉支領不能應時。何如就近籌糧。兵丁得需實惠。著各路帶兵大臣。及各該督撫等。嚴飭糧臺承辦各員。查照舊章。征兵每名。日支口糧米八合三勺。月支鹽菜銀九錢。並於出邊口之日。加給鹽菜銀四錢。凱旋進邊口之日。即行停止。其各路防兵。除隨時酌撤外。其餘即照舊例覈支。毋庸加給銀四錢。以示區別。務須各就地方情形。迅速儲備糧石。值此秋收之時。籌辦較易為力。其有漕省分。徵存未運漕糧。均准各該糧臺就地動用。並准碾動各屬倉穀。其無漕省分。均令於所屬倉穀項下。酌量關支。仍將動用各項糧石數目。分晰報部。以憑查覈。至各處情形不同。並著隨時體察。或籌項採買。或

勸諭捐輸。或由鄰省轉運。務即通融籌辦。各該大臣督撫等。具有天良。當此軍餉支絀之時。均應趕緊設法。儲糧抵餉。以濟急需。毋得徂於糧臺積習。坐待撥款。致有貽誤。將此由五百里各諭令知之。○河東河道總督長臻奏。工程水勢情形。得旨。今歲秋汛。為日尚久。尤應加意慎重。○以戶部尚書文慶。管國子監事。○以勦辦江蘇揚州府屬土匪出力。賞知縣任桂。花翎。餘升敘有差。○已卯。諭軍機大臣等。勝保等奏。近日圍勦情形。並力籌進攻一摺。所稱宣洩積水。鑄造大礮。均不免過於迂緩。其遣人內應一節。尤屬毫無把握。此時總以四面齊攻。立破州城。將該逆就地殲滅。方為上策。若任其突

竄再圖追襲。雖勦辦較易。仍恐別有蔓延。據奏飭令附近州縣刈割秋禾。並將魏家灣船隻移撤下游。均為豫防賊竄。起見。該大臣所籌多派馬兵分投探路。現在該逆尚未竄出。馬能必其經由何路。徒分馬隊之力。亦非良策。崇恩現已回營。德勒克色楞善祿等均已四面嚴扼。即著勝保督飭各路兵勇迅速環攻。務將該逆就地勦滅。如有竄出零匪。即著崇恩嚴飭各該州縣汛兵練勇節節扼截。以便馬隊跟蹤緊勦。儻不豫籌布置。致該逆再有踞城抗拒之事。朕惟該大臣等是問。將此由六百里加緊諭知勝保。並諭德勒克色楞善祿崇恩知之。○刑部奏審明李黑子等冒充差役向車戶索詐錢

文。按例從重定擬。得旨。李黑子著改發黑龍江。給兵丁為奴。董得兒。王年兒。馬大。崔二格。均著改發極邊足四千里充軍。當此軍需緊要之際。豈可稍有輕縱。藉端需索。罪在不赦。豈可尚分偶爾與否。又斷云。與實在棍徒。屢次生事。無故擾害者。有閒更不成話。彼例云。棍徒者。係指不安本分。私相訛詐而言。與此案之藉差役為名。毫不相涉。胡不斷云。假差嚇詐。致被詐之人自盡。斬候上減一等。正與此案相符。爾部為刑名總匯。平日堂司各官。所講求者何。朕為汝等愧極。○哈密辦事大臣明誼。慶英奏。遵議抵充銀數。並裁減各款。覆覈另奏。得旨。速行覆奏。部所定限。原防各處延宕。若能趕緊節減。

究屬有益。豈有依限具奏之理。實屬糊塗。○命前任山東布政使劉源灝來京引見。○賞喀什噶爾領隊大臣舒興阿。三品頂帶。署秦甯鎮總兵官。兼總管內務府大臣。○賞阿克蘇辦事大臣倭什琿布。副都統銜。為喀什噶爾辦事大臣。以伊犁領隊大臣謙亨。為阿克蘇辦事大臣。賞二等待衛珠明阿。頭等待衛。為伊犁領隊大臣。○戶部議准陝甘總督易棠疏報。烏魯木齊塔西河等處。新增墾地一十頃八十畝。照例升科。從之。○庚辰。諭內閣。楊需奏。先後克復京山等州縣城池一摺。湖北京山縣城池。被賊竄踞。經安襄鄖荆道羅遵殿。派委員弁。會同該縣知縣杜嘉善。督率紳勇進攻。屢次殺斃賊

匪千餘名。擒獲長髮賊目等一百二十餘名。於五月二十六日。將縣城克復。其竄踞孝感縣之賊。經該縣知縣李殿華。帶勇於楊店。小河溪等處進剿。先後獲勝二十六次。擒斬賊匪一千六百餘名。七月初九日夜間。於河干縱火焚燒賊船數十隻。賊眾驚潰。隨將縣城收復。四川松潘鎮總兵雙保。因天門縣被賊竄擾。奉檄往剿。隨督同署參將常德等。於七月十九等日。與賊接仗四次。焚毀賊船八十餘隻。殺斃賊匪四千餘名。擒獲二百四十餘名。餘匪溺水燒斃者無算。二十二日。將縣城攻克。孝感縣知縣李殿華。復會同甘肅遊擊孫學瀛。在籍知縣喬綏福。於七月二十三日。將黃陂縣城攻克。麻城

縣踞城之賊。經署黃州府知府許賡藻。署麻城縣知縣賀榮。黃岡縣知縣翁汝瀛。督勇勦捕。焚毀賊巢數十處。遂進逼縣城。賊眾於夜半竄出。復被擒斬一百餘名。該縣城池。隨即收復。湖北被擾各州縣。先經官文等奏報。將沔陽州克復。茲復據楊需奏報。克復京山等縣。荆襄附近地方。漸可肅清。其竄逸餘匪。仍著楊需嚴飭各該地方官。迅速按捕。毋留餘孽。甘肅瓜州營守備鐵振國。迎勦不力。著即革職。以示懲儆。諭軍機大臣等。向榮奏東壩肅清。高澗克復。並金陵水陸大獲勝仗一摺。覽奏稍慰朕懷。此次陸路殺賊不下三千餘人。水師亦將賊船沈燬殆盡。並擊斃逆首秦曰綱一名。該逆狡獪

已久。經此大創。洵足以寒賊膽而振軍威。粵東紅單船。本係得力舟師。一經調度合宜。即可指揮如意。所稱上游賊援一斷。即陸路亦易得手。此是一定之理。向榮正可乘此聲威。督飭吳全美等。統帶師船。迎賊所向。往來勦洗。一面親督陸路兵勇。合力圍攻。迅圖克復。堅城殲擒首惡。為次第肅清江面之計。所有避匿高澗湖口。賊船尚有一百餘號。仍著嚴飭福興所挑水師兵勇。竭力按捕。悉數掃除。免致另圖滋蔓。仍須督飭該處派防將弁。嚴扼逆眾乘虛回竄之路。至余萬清。勦辦鎮江賊匪。日久無功。前經降旨飭查。原恐其不能得力。究竟該革員於防勦事宜。能否獨當一面。著向榮隨時察看。據

實具奏。毋得稍涉瞻徇。自干重咎。將此由六百里加緊諭令知之。尋奏。余萬清自抵鎮營統兵以後。尚屬愧奮出力。報聞。○又諭。昨因新授欽差大臣托明阿到揚尚需時日。諭令陳金綬暫行接辦。並諭雷以誠。仍留軍營。會同辦理防勦事宜。本日據翁同書奏。瓜州賊情。並請飭上游南岸州縣。多募水勇。以資夾擊等語。逆賊跨江踞守。原應無分南北。會合上下。游水陸各軍。協力進攻。庶勦辦可期得手。現在瓜州一鎮。負嵎如故。鎮江賊踪。勢必不能斷絕來往。前經琦善修造多槳礮船。即日竣工。正可乘機扼勦。以圖攻克。著陳金綬。雷以誠。迅即督飭陳國泰。統領紅單師船。順流下駛。並飭駐守焦山。

之周士法等。所統各船。同時泝流合擊。不得因托明阿尚未到營。致令該水師將弁。頓形鬆懈。儻有不遵調度者。即著陳金綬等。嚴叅治罪。其陸路官軍。並著妥為調遣。一面知會余萬清。併力堵勦鎮江賊匪。使該逆於南北兩岸。不暇應接。自不難一鼓殲除。其回竄揚州。及旁擾通泰各路。並著與德興阿等。嚴密籌防。勿稍疏失。武慶防守浦口。尚屬得力。近復截勦賊船。屢獲勝仗。著即由陳金綬。傳知該總兵。仍前防勦。既須遏賊北竄之衝。仍當督飭江浦六合民勇。與向榮互為聲援。合力廓清江面。至翁同書所稱浦口水勇。由本地團集。不費口糧。南岸各州縣。亦可仿照辦理。著陳金綬等。咨商向榮。

飭令該地方官相機籌辦以期聲勢聯絡眾志成城於攻勦更有裨益將此由六百里加緊各諭令知之○又諭前因楊需軍營兵餉不敷諭令官文將川餉截留二三成外餘銀悉解襄陽應用本日據楊需奏接到官文來咨僅撥銀二萬兩並稱前解省城之項仍留作遣發武昌兵勇之用等語現在楊需軍營需餉甚急較荆州更為喫緊武昌兵勇業經駱秉章資給銀米無須多為留備該將軍截留川餉竟至十五萬兩之多實屬不知緩急著官文即按照楊需所咨如數迅速籌撥解往該署督軍營毋得稍有推諉嗣後各路解餉過荆斷不准截留過多專顧一隅置大局於不問至官文前奏螺

山緊要派令魁玉等前往協勦茲據楊需奏此項兵勇留荆則中路無兵可派而吳振鏞等所帶兵勇復經官文改派則西路亦形單薄著官文迅飭楊昌泗將原帶兵勇全赴襄陽勿稍延緩魁玉即著管帶所收武昌兵勇一千六百名留在荆州應往何處防堵並著官文妥為調遣其張于銘吳振鏞鍾埈分帶之練勇均令悉照原議不可再有更動參將王國才著官文即飭該員馳赴楊需行營以資差委總之此時攻勦緊急軍營號令須歸畫一若因彼此意見不同紛紛更調必致將弁無所適從所有進勦機宜均著統歸楊需妥籌布置該將軍如有必須參酌之處即與楊需熟商籌辦不得稍

分畛域。將此由六百里加緊諭令知之。○又諭楊需奏克復京山等州縣。並調荊州官兵軍餉。及請飭江西派兵出勦各摺片。現在京山等州縣均已收復。惟漢川尚為賊踞。江北大局已可粗有頭緒。亟應乘勢進攻。豈可坐令兵單餉絀。致成株待。楊需中路舟師。由襄陽直達漢水。原為東西兩路聲援。嗣因官文奏螺山緊要。恐魁玉等折赴襄陽。轉形紆緩。是以准其所請。令魁玉等沿北岸夾擊而下。徑出大江。即可攻漢陽之正面。今據楊需奏。此項官兵全留荊州。則中路無兵可派。而吳振鏞、鍾埈等所帶兵勇。復經官文改派。則西路之師亦形單薄。所籌均係實在情形。著楊需即飛咨官文。速飭楊

昌泗將原帶兵勇全數帶赴襄陽。毋得再有推諉。其魁玉一員。即著管帶荊州所收餘兵一千六百名。留荊交官文調遣。張于銘由鍾祥赴漢川之勇。吳振鏞等由朱河赴沔陽之兵。鍾埈由沔陽赴漢陽之練丁。均著悉照原議分路進勦。不可再有更調。當此軍務喫緊之時。若號令不能畫一。將弁無所適從。必致貽誤大局。此後楊需應如何調遣之處。即著一面奏聞。一面迅速布置。不得因意見稍歧。徒延時日。所需荊州截餉。即著咨明官文。如數籌解。儻有藉詞推卸。即行據實具奏。參將王國才亦著迅調赴營。以資差委。至襄陽防兵需餉。前已疊諭王慶雲籌辦。第該省供給皖楚軍餉。為數不少。此

時司庫亦頗形支絀。山西情形除撥各路軍餉外，並須兼顧京餉。即能酌量撥解，亦恐未可深恃。著楊需將所需銀數，咨商各該撫酌辦。仍飭該地方官設法勸捐接濟，不論銀米。但期足敷兵食，較勝遠道轉輸。襄陽為完善之區，現又為司道大員駐劄處所，勸辦當易為力。安陸等處餘匪，仍著趕緊搜捕。務使一律肅清。楊需亦不得因此零星遺孽，坐受牽掣，致誤克復機宜也。將此由六百里加緊諭令知之。○又諭駱秉章等奏水陸官軍四獲勝仗一摺，逆賊竄擾岳州，疊經我兵擊退。茲復經水陸官軍奮勇齊進，四次獲勝，洵足以寒賊膽。正可乘此聲威，直擣武漢。著塔齊布、曾國藩將城陵磯餘匪。

迅速剿除淨盡。即日整師東下，毋再延誤。本日據楊需奏京山、孝感等州縣先後收復，現已派令佈克慎、台湧帶兵由雙廟進剿，並令雙保、福忻等由天門進取漢川。魁玉、楊昌泗等由襄陽水路進趨漢口。該署督亦即日統師前進。此時南北兩路辦理均屬得手，並經官文等奏報已添撥兵勇，派同知銜李光榮等統帶，由調弦口協剿。當此官兵雲集，應如何聯絡聲勢，分投進逼之處，並著塔齊布等與楊需官文、孟商妥辦。無失事機。至前諭塔齊布、陸路官軍能否由通城、崇陽一帶直攻武昌之背，並著悉心籌畫，隨時奏報。塔齊布、曾國藩自帶兵以來，既未嘗遇敗而怯，定不致乘勝而驕。總宜於妥

速之中。持以慎重。則楚省賊蹤。漸可掃蕩。岳郡地屬緊要。前
諭駱秉章。飭令胡林翼。督帶練勇。前往嚴防。該撫定已遵辦。
仍著將該臬司於何日抵岳。如何設防之處。迅速馳奏。將此
由六百里加緊各諭令知之。○又諭。前因逆匪竄踞九江郡
城。已有旨。令陳啟邁。嚴飭羅玉斌等。統帶兵勇。相機進剿。茲
據楊需奏。稱武昌下通九江。為省城第二重門戶。必須水陸
並下。會同江西兵勇。以扼九江。則楚北庶可肅清等語。著陳
啟邁。速派兵勇。一出九江。以通江路之聲援。一防義甯。以遏
陸路之竄越。固江西之藩籬。即可保長江之門戶。該撫不得
以兵單餉絀為詞。置全局於不顧。本日又據向榮片奏。江西

應解江南兵餉。自三月以後。並未解到。現在金陵攻勦逆匪。
萬分喫緊。需餉甚鉅。著陳啟邁。即將三月以後欠解各餉。趕
緊起解。並著嗣後按月協濟。以供支應。毋稍遲延。將此由六
百里加緊諭令知之。○又諭。向榮軍營餉需。前經飭令浙。江。
江蘇。江西。廣東。按月籌濟。茲據向榮奏。稱廣東半載以來。僅
報解五萬兩。遲久未到等語。金陵水陸攻勦。正當喫緊之時。
所有紅單挖疊各船。需餉尤鉅。必得按月協濟。方不致滋貽
誤。著葉名琛。柏貴。迅將應解之餉。源源接濟。俾得及時支應。
以資進剿。毋稍遲延。將此由六百里加緊諭令知之。○參贊
大臣僧格林沁。奏賊匪梟水思遁。迎勦續獲勝仗。得旨。逆匪

實已窮蹙。指日定可殲除。猶不可稍涉大意。致令竄延。僧格林沁晝夜艱辛。朕甚廛念。著傳諭眾將吉迅速成功。同膺懋賞。○以勦辦湖南城陵磯賊匪獲勝。賞知府羅澤南花翎。兵丁李榮華藍翎。餘升敘有差。予陣亡都司諸殿元。千總劉士宜。祭葬世職。○辛巳。諭內閣翰林院侍講清安奏。大錢未能流通。請嚴禁阻撓折算等弊一摺。現在行用當百大錢。該商民等自應恪遵錢面數目。照常交易。乃近日以來。竟有任意折算阻撓等弊。以致未能流通。著步軍統領衙門。順天府。五城。悉心妥籌辦理。務期一律暢行。便民利用。至現獲私鑄各犯。並著刑部。於訊明後。按照新例。迅速分別辦理。不准稽延。

時日。○又諭富興阿奏。戶部順天府書吏。以銀抵換鈔票。請飭認真審訊一摺。此案情節較重。如果該官吏等有通同舞弊情事。必應徹底根究。從嚴懲辦。著刑部堂官督飭承審司員秉公嚴訊。務期水落石出。不准稍有瞻徇。並著將訊出大概情形。先行具奏。○以辦理團練出力。賞陝西華陰縣知縣倪印垣等升銜優敘。○壬午。諭軍機大臣等。有人奏河北銅山。豐沛間。有新起土匪頭目張彥李大選。杜四。杜五等。聚眾千餘。在水路擄掠為患。現在江南徐州一帶。正值防堵喫緊之時。豈容此等匪徒嘯聚。貽害地方。若不乘其初起。即行掩捕。將來蔓延日甚。更恐與逆匪暗相勾結。著怡良。吉爾杭阿。

楊以增崇恩嚴飭該地方文武並酌派兵丁會同嚴密查拏該二省交界處所務當不分畛域一體拏辦俾絕根株毋任一名漏網將此由四百里各諭令知之○癸未諭軍機大臣等楊需奏籌畫進剿兵餉竭蹶情形一摺湖北收復京山等五縣之後大兵四路雲集亟須乘勝直趨武漢肅清蘄黃斷不能因餉需支絀致誤事機茲據楊需奏官文函稱川餉十萬兩先已動用所餘無多續到三萬兩亦復截留何至不知緩急若此荆州現在情形較之武漢孰輕孰重楊需統帶之兵較之荆郡防兵孰多孰少官文豈不知之乃不顧大局任意指留顯係心存畛域著官文將所有前此截留用贖款項

悉數先行解交楊需大營並將以前如何支銷各項銀兩迅即查明詳細開單由驛具奏其川省以後解到第二三起銀六萬兩即由該署督迎提改道當陽行走期於近捷不准截留荆州其川兵練丁之餉仍歸襄陽糧臺支發以清款目該署督仍當迅籌進攻並一面知會塔齊布曾國藩等速行東下會合勦辦不得坐待餉銀轉致遲誤官文前奏原任荆州府現調武昌府知府莊受祺護送巡撫學政關防前赴德安該員何時至荆其調署武昌曾否到任省垣失守之時該員是否先已離省其隨同青麀至荆之武昌府遺缺知府祿勳等各員有無札調出省差使抑係藉詞隨同前往並已革巡

撫崇綸實在下落。及藩司岳興阿。臬司曹楫堅等。確實殉難。各情節。均著官文。楊需速即詳查。據實覆奏。將此由六百里加緊各諭令知之。○又諭楊需奏兵餉支絀。請速飭籌解。以資接濟一摺。據稱現存兵餉。不敷十日之用。山西陝西餉銀。到楚尚需時日。已函商英桂。於河南暫借銀三萬兩。俟山陝餉到歸還。並請飭山西陝西撫臣。速即設法通融接濟。以應急需等語。逆賊竄踞武漢。急應克復。楊需現分三路進兵。需餉浩繁。自應於鄰近省分。妥籌接濟。著英桂速撥銀三萬兩。剋期解往。仍俟山陝餉銀過豫時。扣存歸款。並著恆春王慶雲。於各該省。無論何款項下。迅速籌畫銀各數萬兩。即日遴

委委員。解赴楊需軍營應用。無許遲延。並知照經過各地方。毋許截留。致有貽誤。將此由六百里加緊各諭令知之。○乙酉。

上詣

壽康宮。問

皇貴太妃安。○諭內閣。惠親王等奏。本年王公大臣秋俸。請變通抵放一摺。著依議行。惠親王應領俸銀。前經奏請俟軍務告竣。再行支領。所有本年秋季俸銀。著加恩賞給一半。○諭軍機大臣等。勝保等奏。逼近賊巢。劄營建築礮臺。力籌勦辦。一摺。逆匪占踞高唐。幾及四月。早應移營逼近賊巢。用礮攻

擊該大臣業經迂緩於前。以致日久尚無把握。此時惟有督率兵勇。合力進攻。迅圖克復。仍當設法揀選精銳。一鼓登城。不得專恃礮轟。別無善策。儻該逆窮極思竄。即可乘勢殲除。斷不准再令蔓延。擾害他處。該大臣所帶兵勇。為數不少。果能明攻暗襲。何至蕞爾孤城。尚藉口於步隊之不能抽撥。所有西南兩面。並著趕緊逼近環攻。以期盡殲醜類。若再曠日持久。勞師糜餉之罪。豈能屢邀寬宥耶。將此由六百里加緊諭知勝保。並諭德勒克色楞。善祿。崇恩知之。○以山東鉅野。鄆城。陽穀。莘。四縣城被賊竄陷。莘知縣廖錫綸。教諭宋源心。張於荼。訓導趙荆岩。宋承慶。典史韓景昌。秦廷慶。守備舒崑。

千總馮賜元。把總楊三樂。崔玉峯。職均逮問。○予山東鉅野等縣殉節知縣朱運昌。文穎。傅士珍。任騰蛟。教諭辛本棟。李文綬。顏懷蘭。訓導公戴東。邢庚虞。典史葉國霖。孫駿。徐鳳喈。瞿濬。千總崔福貴。把總何秉綸。張永隆。外委傅君平。祭葬世職。並建立專祠。傅士珍家屬幕友等。旌卹如例。併附專祠。○追予山東金鄉縣殉節知縣楊鄭白。建立專祠。家屬幕友等附祀。○丙戌。諭軍機大臣等。前因翰林院侍講清安奏。大錢未能暢行。諭令步軍統領衙門。順天府。五城。妥籌辦理。本日據周祖培奏。大錢壅滯之故。由於使用私錢者。未奉明禁。以致官錢任意折算。奸商官私並用。壟斷出入。故小民疾苦日

甚。請於嚴拏私鑄私販人犯外。明定章程。禁絕使用私錢。以杜銷售之路。各部院及各旗營。給發公費兵餉。均有蠹吏奸役。私行抵換官錢等弊。尤為官私混雜之害。並請嚴拏究辦。各等語。著步軍統領衙門。順天府。五城。按照所奏。悉心妥議。奏明辦理。並嚴拏私鑄私販。不得任其肆行無忌。阻撓國法。原摺著鈔給閱看。將此諭令知之。○又諭。有人奏。江蘇降調藩司倪良燿。於應行督催之截留海運米石。迄今兩載。延不完繳。已革江蘇知縣余龍光。在青浦任內。重賦苛徵。釀成巨案。以致上海等處。相繼失陷。該員實為罪魁。著嘉定縣知縣鄭揚旌。青浦縣知縣張銘曉。於城池失守後。逃匿未獲。署吳

縣知縣張禮。用劣役為心腹。婪贓肥己。縱盜殃民。上元縣知縣岳崇恕。貪污素著。吸食鴉片。不理公事。請飭該督撫。從嚴淘汰。以肅官常等語。現在該省賊氛未戢。地方州縣。禁暴安良。尤關緊要。若不亟加整頓。致庸劣不肖之員。濫竽充數。貽害閭閻。為患匪細。至倪良燿。應行督催米石。前經勒限嚴追。何以至今未據奏報。余龍光。前已有人參奏。交怡良等嚴究懲辦。亦至今尚未覆奏。此外失守城池。及婪贓吸煙。各劣員。皆應及早參劾。著怡良。吉爾杭阿。按照所參各情節。逐一查明。據實參奏。毋得稍有瞻徇。自干重咎。將此由五百里諭令知之。○又諭。有人奏。河南固始。光州。一帶。捻匪數萬人。立旗

幟造偽號以李士林為盟主。任純學為謀主。丁心田、易天幅、李瀾起、劉結大四人為東西南北四路偽元帥。並有著名捻首張全義、朱鳴義等多人。現充光州息縣總役。該州趙登峻、該縣陳棠、貪聲素著。反倚該役等為腹心。以致捻匪聚黨愈多。竟敢焚毀期思鎮、馬岡集、谷堆集等處。並率眾數萬。於二月間攻固始。五月間攻商城。已革南陽鎮總兵柏山擁軍坐視。畏葸不前。僅有固始縣知縣蒯賀孫殲辦捻匪。尚有膽識。反為趙登峻等所排擠等語。河南光州等處民風强悍。平時結捻械鬪。地方官即應嚴拏懲辦。況現在逼近賊氛。更應肅清內匪。以防勾結。若如所奏。地方官縱賊殃民。固屬罪不容

誅。英桂統轄全省。亦豈能辭咎。著即趕緊嚴飭所屬文武員弁協力勦辦。立將李士林等首夥各犯悉數擒拏。盡法懲治。毋令竄逸。並查明柏山如何玩誤。及趙登峻、陳棠、蔡賊情形。從嚴叅辦。以靖地方。再商邱縣知縣宋錫慶在籍給事中陳壇前因商邱失守。同時逃避。曾經降旨。令該撫查拏嚴辦。迄今將及一年。未據覆奏。殊屬不成事體。著即迅速查辦。毋再遲延。干咎。原摺著鈔給閱看。將此由五百里諭令知之。○又諭陳啟邁奏。逆船竄擾吳城、建昌一摺。並賊撲武甯。戕害大員等語。七月十七日。賊船上竄。將抵吳城鎮。兵勇退守上游。十九日。復有賊船三四百號。由渚溪駛入建昌縣界之山下。

渡距省均止百餘里。該撫現飭革員趙如勝酌帶戰船水勇駛往下游。並飭吳錫光等由山下渡陸路追擊。是否足資截勦。本日已諭令駱秉章酌調官兵。並派員管帶馳往協勦。惟鄰省調撥尚需時日。誠恐緩不濟急。而羅玉斌攻勦九江。以分賊勢。亦斷難撤回。此時省城情形萬分喫緊。必須司道大員帶兵出省。相機堵截。未可專待外援。任其猖獗。臬司惲光宸前曾帶兵出省。並未馳赴武甯。現在賊氛逼近。若仍株守省垣。專恃趙如勝等帶兵勦辦。勢必貽誤事機。著陳啟邁即於司道中遴派得力之員統兵前往扼要駐劄。為迎頭截擊之計。其由興國州竄撲武甯之賊眾至二萬。該縣甫經收復。

城內弁兵不過千餘。不敷堵勦。並著該撫嚴飭署鹽道王訓迅速帶兵馳往勦辦。毋稍延誤。江西與鄂楚毗連處所甚多。若楊需等進兵攻勦。前後夾擊。更恐逆匪乘隙竄擾江西。是內患未靖。又須堵禦外來賊黨。儻防勦稍疏。勢必滋蔓難圖。著該撫嚴飭帶兵文武員弁防勦兼籌。不得稍涉大意。並將逆匪情形隨時馳奏。陣亡之遊擊富克金泰等著查明請卹。將此由六百里加緊諭令知之。○又諭據陳啟邁奏逆船竄擾吳城。建昌逼近省城。兵力不敷調遣。請飭湖南仍令上年來江助勦之官紳朱孫詒羅澤南等管帶兵勇前來協勦等語。江西賊勢猖獗。省垣兵力單薄。急須鄰省分兵援救。著駱

秉章。迅即選派精兵三四千名。馳赴江西。以資接應。惟現在朱孫詒。羅澤南。皆帶兵勇。隨同勦賊。甚為得力。該二員能否派往。著該撫酌量緩急。妥籌辦理。如實在不能分撥。即著另揀得力員弁。管帶所挑官兵。迅速馳往江西協勦。毋稍遲緩。致誤事機。將此由六百里加緊諭令知之。○江蘇巡撫吉爾杭阿奏。籌勦上海逆匪情形。得旨。此時萬不可再令竄逸。汝所籌機宜。暨駕馭夷人。均屬妥當。○以焚毀江西九江賊船出力。予民壯孫亮等。升賞有差。○予江蘇陣亡千總蔡夢麟。把總張世珍。祭葬世職。○丁亥。諭內閣。戶部等衙門奏。遵議通政使李道生。條陳錢法一摺。戶工兩局。鼓鑄當百。當五十。

等項大錢。子母相權。便民利用。近因奸商阻撓。以致大錢不能流通。業經刑部定擬罪名。由各該衙門。剴切曉諭。俾共知此項當百以下大錢。永遠通行。決無更改。愚民不致妄生疑慮。奸商亦不敢任意阻撓。以身試法。其私鑄大錢人犯。仍著步軍統領衙門。順天府。五城。一體嚴拏。照新定章程治罪。○又諭。刑部奏。遵旨覈覆知縣罪名一摺。前因已革侍郎雷以誠奏。請將已革署江都縣知縣陸武曾。應得斬監候罪名。量從未減。當交刑部覈議具奏。茲據奏稱。該革員於獲罪後。尚知愧奮。並帶勇殺賊。身受重傷。著有微勞。陸武曾。著准其減等。發往新疆效力贖罪。仍留雷以誠軍營差遣。以觀後效。○

諭軍機大臣等。易棠奏。遵議新疆變通事宜一摺。據稱馬廠及歇種之地。均可開墾。其不便屯兵之處。可募民回墾。種並招內地民人。准其攜帶眷屬。藉資開墾。其兵制之可裁者。如伊犁。烏魯木齊。屯田。可召民回承種。屯兵即可撤令歸伍。其南路各城。換防官兵。若改為眷兵。則烏魯木齊。議添之兵。可無須調往。又各該處。駝馬等。既經變賣。則經牧官兵。亦可入伍。各等語。所奏俱係因時制宜。為籌畫經費起見。惟口外情形。究非該督所能深悉。著奕山。圖伽布。常清。春熙。賡福。按照所奏各條。察看地方民情。悉心斟酌。妥速籌議。據實奏辦。總期通籌全局。節省餉需。而仍於邊防無損。方為盡善。毋得畏

難推諉。徒以一奏塞責。原摺著鈔給閱看。將此各諭令知之。尋伊犁將軍奕山等奏稱。伊犁土性寒薄。難以開墾。下軍機大臣。戶部。會議。尋議奏。伊犁開墾之案。阿桂闢之於前。松筠成之於後。事在必行。以期地利無遺。蒙古牧廠。及官兵馬廠。自應於水草茂盛之處。廣為踏看。分別撤屯。但使可以省餉。不必盡撤其人。屯兵內有情願種地者。即給與佃地。而開其屯。兵糧缺。並於存營兵內。添派換防。抵減內地調撥。經牧兵丁亦如之。不必遽有裁兵之名。而已漸收節費之效。以後停補減抽。實於經費有益。從之。○又諭。向榮奏。水師續獲勝仗。並陸路防勦情形一摺。逆匪自高瀆敗竄後。疊經水師軍船。

大加懲創。江路賊援自可逐漸斷絕。而太平賊船近復闖入丹陽湖內。其窺伺東壩之心。尚未竟絕。現在福興一軍已經調回金陵。其鎮江派防東壩兵勇亦經前赴大營協勦。東壩防兵僅有鄧紹良及上海派往之兵勇約二千名。小丹陽鎮一路僅有傅振邦及張國樑所帶兵勇一千五百餘名。誠恐不敷堵勦。怡良前奏親督兵勇赴無錫常州一帶仍著速行前進。不得因高瀆賊已敗退又復中止。向榮指調之上海軍營總兵虎嵩林亦著吉爾杭阿速飭該員前往怡良軍營協同進勦。如該逆不敢再竄高瀆亦可迎賊所向沿途探勦。此時江面水師正當得手之際。若陸路官兵能繞出太平一帶。

抄賊後路夾攻更易為力。至向榮所稱上游紅單拖舂等船究嫌單薄等語亦係實在情形。逆賊既經屢敗其糾合皖楚逆黨大幫回駛固在意計之中。且湖南賊船經我兵勇大加焚毀已追至嘉魚境內。儻武漢一經收復該逆潰竄下駛上游師船實當其衝。下游戰船既有八九十隻分調十餘隻不至遽形短少。著向榮即知會陳金綬等如北岸無須多船即飭陳國泰將所帶紅單船分撥十隻或十五隻迅赴上游協同攻勦不得稍存畛域藉詞措留。將此由六百里加緊各諭令知之。○又諭塔齊布曾國藩奏沿江追殺賊匪水陸續獲大勝一摺前據楊需奏收復湖北京山各州縣並所籌各路

進勦各情。業經諭令該署督。迅速督兵馳赴武漢。以期與上游水陸官軍會合勦辦。現在塔齊布。曾國藩。自岳州城陵磯以下。沿江追擊。將二百餘里賊巢。勦洗殆盡。已追至嘉魚縣屬。後起大隊官兵。亦即日跟蹤前進。是楚南一軍。愈逼愈緊。漸可駛抵武昌。楊需儻仍株守德安。不即統兵前往。必致東下之師。又成孤軍無援之勢。於攻克武昌全局。仍無裨益。著楊需。即照前奏三路進兵之議。迅飭領兵各員。分道進攻。總以星速出江為要。一面親率精銳。由楊店進發。直趨漢口。會督各路兵勇。與塔齊布。曾國藩。所統各軍。協同攻勦。乘此聲勢。上下夾擊。自無難一鼓殲除。楊需與塔齊布等。一經會合。

兵力更厚。或先克武昌。或併攻漢陽。惟在隨時審察軍情。相機速辦。仍須四面兼顧。不致該逆被勦窮蹙。復有乘虛奔突之患。此時攻勦喫緊。楊需斷不可再事耽延。塔齊布。曾國藩。亦應倍加慎重。總期計出萬全。肅清江漢。毋負委任。臬司胡林翼。帶勇勦賊。尚稱得力。著即隨同塔齊布等。前往湖北。毋庸留於岳州。知府羅澤南。本係隨營協勦之員。亦著毋庸派赴江西。所有岳州善後防堵事宜。即飭駐劄該郡辦理糧臺之藩司夏廷樾。妥為籌辦。將此由六百里加緊各諭令知之。

○又諭。向榮奏請飭催前調福建廣東各官兵等語。金陵大營分勦各路賊匪。水陸口岸紛歧。官軍不敷攻擊。係屬實情。

現在正當堵禦上游各口喫緊之時。設因兵力不足。致多掣肘。何日始能竣事。據奏前調福建漳州鎮屬雲霄同安詔安等營官兵。王懿德以防堵粵界。另調福甯等處兵千名前往。該官兵恐未能得力。此時福建軍務漸竣。著王懿德迅速前旨。即行選調漳州鎮標及所屬雲霄詔安同安各營兵二千名。如數揀齊。派令得力將弁管帶。剋日啟程。前赴向榮軍營。聽候調遣。不得稍分畛域。致滋遲誤。其已調之福甯建甯邵武延平各兵。即撤令回閩。留防本省。毋再藉詞推諉。並著葉名琛。柏貴查明前報啟行之潮州鎮壽山所帶官兵二千名。何以遲遲尚未行抵江南。迅速飭催。即日兼程馳赴金陵。庶

期以速補遲。可望早圖克復。至葉名琛等前奏續派碣石鎮總兵謝焜管帶之控風紅單船共四十隻。尚未出洋。此次江面。勒除金陵城內竄出逆匪。轟擊賊船。不下數百隻。連獲勝仗。全藉粵船之力。惟上下游江面寬廣。往來衝擊。船數實屬不敷。著該督撫等。迅飭前項續調船隻。趕緊開洋。星速駛入長江。以資協勦。並著王懿德葉名琛柏貴將官兵船隻。啟程出洋各日期。一面具奏。一面知會向榮為要。將此由六百里加緊各諭令知之。○陝甘總督易棠奏。勘明隴西等州縣被災情形。得旨。此等事。必須從實具奏。不可稍有諱飾。○命翰林院編修吳存義許彭壽在南書房行走。○以攻勦湖南城

陵磯賊匪獲勝。予湖南提督塔齊布。優敘。賞已革禮部侍郎
曾國藩。三品頂帶。千總何越。珽。花翎。府經歷李續賓。藍翎。餘
升敘有差。○以克復福建永安。尤溪。大田。沙。四縣城。賞遊擊
沙肇修等。藍翎。餘升敘有差。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之一百三十九

